



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE
DREJTORIA E ÇËSHTJEVE JURIDIKE

Nr. 172 Prot.

Tiranë, më 20/3/2015

Lënda: *Jepet mendim*

Drejtuar: **Z. Engjëll AGAÇI**
SEKRETAR I PËRGJITHSHËM
KRYEMINISTRIA

Tiranë

I nderuar Zoti Agaçi,

Në përgjigje të kërkesës tuaj nr.919 prot, datë 25.02.2015, paraprakisht janë konsultuar Ligji nr.9887, datë 10.03.2008 "Për mbrojtjen e të dhënave personale" i ndryshuar, VKM nr.117, datë 05.03.2014 "Për përmbajtjen, procedurën dhe administrimin e dosjeve të personelit e të regjistrit qendror të personelit" si dhe është vlerësuar roli dhe funksioni që ka dhe kryen një Komitet ad-hoc i cili ngrihet për një qëllim të caktuar.

Në këtë kontekst, në përputhje me ligjin nr.9887, datë 10.03.2008 "Për mbrojtjen e të dhënave personale" i ndryshuar, dosja personale e punonjësve përmban në dokumentet e administruara të dhëna personale apo edhe sensitive dhe si e tillë, trajtimi i saj duhet bërë në përputhje me këtë ligj.

Neni 5/1/b i ligjit nr.9887, datë 10.03.2008 "Për mbrojtjen e të dhënave personale" i ndryshuar, në të cilin shprehimisht citohet "...të dhënat personale duhet të grumbullohen për qëllime specifike, të përcaktuara qartë, e legjitime dhe në përpunimin në përputhje me këto qëllime", kërkon që përpunimi i të dhënave personale të administruara në dosjet personale të punonjësve të kryhet në përputhje me qëllimin për të cilin ato janë mbledhur dhe nga kategori të caktuara.

Në rastin konkret të dhënat personale të punonjësve/subjekteve të të dhënave personale, të administruara në dosjet personale janë mbledhur me qëllim rekrutimin e tyre në detyrë, për rrjedhojë përpunimi i tyre vlerësohet i drejtë dhe i ligjshëm vetëm në përputhje me këtë qëllim.

Rrethi i kategorive që njihen me këto dosje dhe për rrjedhojë që përpunojnë të dhëna personale është parashikuar në pikën 5 të Kreut I të Vendimit nr.117, datë 05.03.2014 "Për përmbajtjen, procedurën dhe administrimin e dosjeve të personelit e të regjistrit qendror të personelit" të Këshillit të Ministrave. Përveç përcaktimeve konkrete në këtë dispozitë sa i përket personave apo institucioneve që kanë të drejtë të njihen me dosjet, është parashikuar se një atribut të tillë e ka edhe çdo institucion i ngarkuar me ligj. Nën këtë arsyetim, nuk mjafton fakti i ngritjes dhe funksionimit të kontrolluesit/komitetit ad-hoc nëpërmjet një akti ligjor, por nevojitet përcaktimi i qartë në këtë rast (si dhe në çdo rast tjetër) i qëllimit të përpunimit të të dhënave personale nga ky komitet. Thënë ndryshe, njohja dhe verifikimi i të dhënave në dosje, në tërësi kryerja e një

hetimi në këtë rast duhet të përcaktohet shprehimisht në një dokument ligjor.

Qëllimi duhet të parashikojë 1) pse do të realizohet verifikimi i dosjeve personale, 2) nëse do të realizohet për një pjesë të tyre apo për tërësinë e tyre, 3) nëse do të realizohet për një periudhë të caktuar rekrutimesh si dhe 4) nëse në përfundim të procesit për nga rëndësia e zhvillimit të tij, do të duhet të bëhen publike raporte apo vendime të cilat identifikojnë subjektet e të dhënave.

Pas përmbushjes së këtyre detyrimeve dhe përpara nisjes së përpunimit të të dhënave, kontrolluesi/komiteti ad-hoc duhet të kryejë njoftimin përkatës pranë Zyrës së Komisionerit për të Drejtën e Informimit dhe Mbrojtjen e të Dhënave Personale, në përputhje me nenin 21 të ligjit nr.9887, datë 10.03.2008 "Për mbrojtjen e të dhënave personale" i ndryshuar.

Pas ezaurimit të këtyre procedurave dhe me nisjen e përpunimit të të dhënave, në këtë rast, kontrolluesi/komiteti ad-hoc, në përputhje me nenin 18/3/b, nuk është i detyruar të japë informacion apo të informojë subjektet e të dhënave personale/punonjësit, pasi të dhënat/dosjet nuk merren nga këta të fundit, por merren nga institucionet që i administrojnë ato, pra nga kontrollues të tjerë. Por, nëse gjatë kryerjes së verifikimit të dosjeve mund të lindë nevoja e marrjes së të dhënave apo provave nëpërmjet vetë subjekteve të të dhënave/ punonjësve apo të tjerë persona, atëherë kontrolluesi/komiteti ad-hoc në përputhje me pikën 1 dhe 2 të nenit 18 të ligjit për mbrojtjen e të dhënave personale është i detyruar të informojë subjektin e të dhënave për fushën dhe qëllimin për të cilin do të përpunohen të dhënat, për mënyrën e përpunimit, për të drejtën për akses si dhe nëse dhënia e të dhënave është e detyrueshme apo vullnetare, etj.

Ndjekja e kësaj procedure bën përpunimin të drejtë dhe të ligjshëm nga kontrolluesi/komiteti ad-hoc.

Ndërsa, nëse gjatë procesit të verifikimit të dosjeve, kontrolluesi do të përpunojë të dhëna sensitive si vërtetim të gjendjes gjyqësore, raport mjekësor apo të dhëna të tjera në përputhje me përkufizimin "e dhënë sensitive" dhe nëse në përfundim të procesit të verifikimit të dosjeve, kontrolluesi vlerëson bërjen publike të tyre, atëherë ai më parë, në përputhje me parashikimin e bërë në nenin 7/2/c të ligjit nr.9887, datë 10.03.2008 "Për mbrojtjen e të dhënave personale" i ndryshuar, duhet të paraqesë kërkesë për autorizim pranë autoritetit përgjegjës në këtë rast pranë Zyrës së Komisionerit për të Drejtën e Informimit dhe Mbrojtjen e të Dhënave Personale.

Në përfundim, kontrolluesi/komiteti ad-hoc, gjatë gjithë procesit të verifikimit duhet të ruajë karakterin konfidencial të dosjeve, ndërsa rasti përjashtimor do të vijë si pasojë e prevalimit të interesit të rëndësishëm publik siç theksuam më sipër dhe vetëm pas pajisjes me autorizimin përkatës.

Duke ju falënderuar për bashkëpunimin,

